

Fasnacht 2022

Blagèèri



e VSG Bangg

Gege Corona duets jetz Impfige gää
E Serum ka däm Übel dr Schregge nää
S' goot nit yberall do kasch flueche und schimpfe
Gege e Ziirischnuure kasch aifach nit impfe

Dr neyi Stadtpresidänt dr Beat Jans
Verspricht fyr Basel wiider neye Glanz
Dr Fortschritt jo dä seht e jeede
Dr Beat kaa aifach viil besser reede

Ob Koks ob Gras oder Extasy
So Saich wärfe sich die Junge ii
Abr s'diggtachte isch jo do muesch loose
Wägere Impfig hän sie dr Gagg in de Hoose

D'Abfuhr und d'Schugger sind elektrifiziert
Bi dr Fүүrwehr wirs au glii probiert
Im Roothuus dien si Stromkaabel verlegge
Zum Awäsendi us em Tiiefschloof z'wegge

Bim FC Bayern wird das Johr gjublet wie bsoffe
Em Gerd Müller si Goolrekord isch ybertroffe
d'Ironie isch doo und mir hänn's gnosse
E Pool hett äntlige retour gschosse

Wenns schleeglet und Stieel durch Gegend fliege
Muesch di bugge zum nytt an d'Birre z'kriege
Wenns schießt und sticht bisch in kaim Krimi derbii
Das isch e Ussgang in dr Staine gsii

Kai Holz, kai Alu, kai Magnesium, kai lise
Wäg Corona isch yberall Krise
Do sait mini Alti voller Stolz
Vor minere Hütte hetts gnueg Holz

Fyr d' Affe im Zolli bruchts schintz Menscherächt
Mir wisse nitt isch das guet oder schlächt
Aigentligg sette si die Rächt bikoo
Im Roothuss hogge Esel und die hänn si schoo

E Fasnacht im Summer hett Vorteil das muesch see
Machschr Cortége in dr Badi und nit im Schnee
Anstatt Mählsuppe löffle losch Sangria koo
Und passt Koschtym nimmi ,kasch ni de Badhoose goo

Dr Djokovic hett kai Visum bikoo
Drum hett är miesse Auschtralie verloo
s'druurige isch und das hett mi gschluucht
dass e Schwoob fyr Basel kai Visum brucht

Sit Pandora Papers diens alli wysse
Wär bschisse kaa duet bschisse
Dr Vinzenz vo dr Raiffaise lieegt alli aa
Und dr Ex-Papscht het vo Biebli kai Ahnig kaa

**Wottsch au by uns bänggle?
Uff www.vsg-basel.ch erfahrsch meh!**

Drugg: Amerbach'sche Druckerei, Muttenz



Fasnacht 2022

D'Schnaps bagge

E Basler Baizer hett e Idee gha, wie me e Virus ka vernichte, ganz bequem
E versüüchte Geegestand in Baggoofe bi 100 Grad, das leest s'Problem.
Ha's probiert mit dr Schwiegeramsle, s'hett nit funggzioniert, y ka's nit verstoh,
die isch mit em genau glyych hässige Stai wieder zem Oofe uusekoo.

Ych ha e alte Frind droffe; ouuuhh, hän mir uns lang nimmi gseh!.

Mir hän is prächtig unterhalte Bimene Tässli Tee.

Und will me sich nit derf umarme, hämmer is nur beriehrt mit dr Fuscht

Aber als Zaiche vo dr Verbundehait hämmer denn d'Gsichtsmasgge tuscht.

Liebed ihr au Graubünde? D'Lyt sin sympathisch und au gueti Chrischte

Es hett sich jetzt aber uusegestellt, deert oobe lääbe schlimmi Rassische.

Wenn ich deert Ferie mach, teent's amme ganz unagnähm in de Ohre,

wenn e Bündner zue mir sait: «Ey, tschau, bis Moore»!

Ych bi jetzt neu kantonale Pimate-Beuffdraite – ouh, hän die Freud im Zolli,

ych tritt fir d'Rächt vo däne Tierli yy und ha d'Verantwortig – die volli!

Jetzt hett dr Grossi Root zuesätzlich – ych ha's geschter de Affe verzellt,

mir au no grad d'BVB-Verwaltig unterstellt.

Wissed ihr, wär d'Sächs in isch? Wenn uff Allschwil kunsch, kennsch se grad,

oder d'Zähnin uss em Laimedaal, oder d'Achtin us em Neubad?

D'Zweiin us em Eglisee, vo däre muesch nyt welle,

ych ha au numme dschendergerächt welle e baar Tramlinie uffzelle.

Ych bi letschthi dur d'Stadt flaniert, die Freyi Stross durab, elai, ohni Kollege,

do kunnt mir doch uff halber Höchi soone Bättler entgege.

«Du mir geben Geld, ich arm, keine Frau», so hett är s'Gspröoch yyglyttet.

Do sag y: «Kasch e Wuche **mi Frau** ha, denn waisch, was arm syy bedyttet.»

Dr vo Wattewyl hett zum Hübse gsait: «Los Alte, ych mach's do nimm lang,

Basilisk, TeleBasel, aber bi dir isch jetzt Schluss, das stresst mi efang.»

Wo das bekannt worde isch – hey, es isch woor und schriftlich begründet –

hän eppe 2000 Fraue bim Hübse-Theater s'Abo kündet.

Noch em Lockdown hett unsere Opinion Leader e Speech duuregfiert

Är hett an Commitment und an Business Interest appelliert:

«D'Roadmap fir Approach und Apertizing stoht, mir geehn All in One,

s'Fact-Sheet fir d'Customer Retention au, hey Guys, have Fun!

Fir Distribution Inhouse gänd em Guschti e Message dä kennt s'Handling genau,

fir Screening brucht's Brand-Experience und Life Balance, das macht e Frau.

Wenn ihr s'Process Recap in Exit-Mode yybindet, ka sich niemer beklage,

Zaiget Hard Skills, sind Game Changer, ihr mergged, was ych will sage»!!

Ych dringg zem Zmorge e gaaanz glaine Kaffi und iss e gaaanz glaini Schnitte

Zem Znacht e Müesli und e Glas Wasser, do muess ych aber scho drum bitte.

Und sunscht im Lääbe unuffällig und demüetig blyybe, das isch mini These,

Ych schaff halt nit bi dr Raiffyise und ha kaini Spese.

Wottsch au by uns bänggle?

Uff www.vsg-basel.ch erfahrsch meh!

Drugg: Amerbach'sche Druckerei, Muttenz



Fasnacht 2022 **BÄFFZGI**

~~Schnitzel~~-Bangg

Ych mecht's Eych zerscht saage – ohni e Wangg mir sinn
kai Schnitzelbangg me, numme no'ne Bangg das Wort
«Schnitzelbangg» muesch jetz aifach vergässe
denn d'Bäffzgi hänn in dr Quarantäne d'Schnitzel gfrässe.

Im Baselbiet umzingled mi kirzlig e Rudel Wölf
ha aber kai Angscht gha, doch immerhin sinns scho 12
aber wo no dr 13. Wolf aane springt
hani doch no Angscht bykoo, will jo 13 Ungligg bringt.

Die Alte kemme wieder, au d'Gruppe ABBA isch wieder koo
und dr Gottschi vom «Wetten, dass...» isch au wieder doo
mer sinn's jo efang gweehnt, ass all dä Urzyt-Schund
im Schwiizer-Färnsee au allbott wieder kunnt.

Paarschipp losst in dr Wärbig verlute
es verliebe sich zwai Mensche alli 11 Minute
eb das em Bettfädere-Fischer und dr Frau Sadi gfalli
isch nit bekannt, aber mer hänn jo jetz d'EHE fir alli.

In de Läden wird efang vill klaut und gsthole
wemme se verwitscht kunnt se d'Bolizey ko hole
wenn aber in dr IKEA ain klaut und no umme peeblet
wird dä in däm Möbelhuus aifach zimpftig vermeeblet.

Jetz selle d'Fraue in dr Armee neyi Glaider bykoo
s'Mässer hänn scho und e neu's Outfit wurd ne stoo
statt so dyryi Klamotte könnt me au – ohni z'gschbasse
däne Grytte aifach numme e Tarnkappe verbasse.

Dr Federer hett's gschaftt immene Globi-Buech z'stoos
und är hett's gschaftt, Boscht hett en uff e Briefmargge gnoo
denn gitt's no e Federer-Drämmli, s'isch saagehaft
und als Hehepfunggt hett er's no bi uns uff e Helge gschaftt.

Mi Maa nimmt's gnau mit em Abstand yyhalte
aber är ibertrybts mänggmol – mi Alte
vor Allem wenn är zem Byyspiil uff's Hyysli goot
und bim brinzle e Meter fuffzig vor dr Schissle stoot.

Es koschtet Millione, aber si laischte sich's ohni z'lyege
in dr Raggeete e bitz im Wältall umme z'flyege
mir laischte uns drfir langi Färnseh-Eebe mitenand
und luege «Eisenbahnstrecken der Schweiz» im Fyehrerstand.

Alli Parggblätz vor em Hörnli selle ewägg, die spinne
s'gitt nur no Duurparggblätz, y main die dinne
jetz muesch halt tschumple oder «mr sinn mit em Velo do»
und dr Bschtatter gschsch mit em Sarg uff em Päggliträger ko.

De Affe und Primate will me s'Grundrächt gee
me vermenschlicht se eso und duet'ne «s'Tierli sy» nee
s'gitt zwar scho so vermenschlichti Affe wo mer kenne
das sinn die – wo sich sythär «Ziircher» nenne.

www.bäffzgi.ch

**Wottsch au by uns bänggle?
Uff www.vsg-basel.ch erfahrsch meh!**

Drugg: Amerbach'sche Druckerei, Muttenz



Fasnacht 2022



Nachtschwärmer

Liebi Lit, y ka Eych schwööre
3-G, 2-G, ka's nimme hööre
Zue viil G, het's mi dunggt
Es bruucht doch numme 1 G – Punggt

Uf dääre Wält passiere Sache
Mir händ zer Zyt nid viil zem Lache
Au wenn sich mänge gaar beschweert
Ämmel händ mir nid meh vo dr Greta gheert

Abstimme, über s'Rächt vo Affe
Sott Sicherhait für Affe schaffe
Y waiss nid, was das sotti nütze
Es wurd nur dr Eric Weber schütze

Mir blyybe grad by de Affe
D'EU wott s'Wort Wiehnacht abschaffe
D'EU hätti nid meh z'Lache
Wenn sy s'glyyche mit dr Fasnacht mache

By letschi wiider byym Gwaföör verbyy
Äär froogt mi, waas darf's das Mool syy
E kuurze Schnitt, ganz e Schnälle
Uf jeede Fall, kai Duurwälle

Y has s'Drämlli-Museum bsuecht
Und nach eme beschtimmte Drämlli gsuecht
Uf das han i gwaartet, jeedes Mool
So gseen'i das Drämmli au emool

E Bitz e Saich, us minere Sicht
Iberaal die Massgepflicht
Es waiss doch jeede, wyt und brait
Ass me nid Massge, sondern Larve sait

Ha my Leerer als zem Wahnsinn dryybe
Bi mee als aimol hogge blyybe
Hit fyyl y mi wie e Propheet
Y kenn s'ganze grieschisch Alphabeet

Wott y nid haim, und wott kai Stress
Schigg y mim Schatz e SMS
D'Uusreed isch albe ganz banaal
Y stegg grad fescht, im Souez-Kanal

Findet sii die Uusreed nid so toll
Denn bring y däa mit em Auschtralische Zoll
Und nitze alli Uusreede kai Bitz
Loss y mi beroote, vom Djokowitz

Wottsch au by uns bänggle?
Uff www.vsg-basel.ch erfahrsch meh!



Fasnacht 2022



Noch Brexit isch Ängland jetz glyy emol stier,
und numme bim Johnson deheim gits no Bier.

Do macht e Gorilla e ganz böses Gesicht.
Är stoht drum in Strossburg am Menscherächts-Gricht

Wenn dr Putin duet schloofe, das isch halt si Stiil,
denn weiss me: jetz sinn die Olympische Spiil.

Me macht seismografisch in Basel e Zellig,
denn bohrt me und s Ärdbeebe wird wider fellig.

D Bangg-Konto-Speese schlöhn jeedes Jahr uff,
dr Scheff vo dr Bangg macht halt Speese im Buff

Dr Ex Papa Benedikt – bloost keim Prieschter dr Marsch
Aber tritt us Knabeliebe – de Missbruchte in Arsch.

Das Djokovicli- serbisch Göttli – mit de Gsundheitsmaröttli.
Statt Vaccinli Essigsöckli – jo, i weiss jo, jetz spöttli.

Petri Heil, Ueli Murer! – het au in dr Freizyt si Nische.
Am e See, wo er rundume – rechtsufrig cha fische.

En Ma mit sim Hund, – uf em Trottoir stöhnd sie,
De Sauhund mit Hund – losst en kacke, denn göhn sie.

Kai Impfstoff für die Schwarze, – nei mir wönd se nöd disse.
Aber s'isch halt so üblich – sone fein sprützte Wyse.

E Frau mit re Frau, en Maa mit nem Maa
Jetzt muesch bald es Schneggli und es Schnäbbeli ha

Quenn stellt ihri Söhn, ase ihre Hofzoo zur schau,
Ain mit Ohre wie d' Esel, und der ander e Sau.

Geg dr Macron dient d' Franzose sich wahnsinnig wehre,
sunsch kunnts no so wyt, dass sy Schaffe mien leere.

Me hasst alles Fremdi, au do in der Schwyyz,
Und Langsam wachse widr d' Högge am Chrüz.

Dr Alex Wilson würd sich gscheiter, dope mit're OVI
Er wär nöd schneller, doch immer no Profi

Dr Ueli Murer sympatisiert, mit de Trichler und mit Rechts
Emohl en Tritt i si Arsch, da wer gär nüt Schlechts

S losst d Hämorrhoid dr Köppel sich pfätze.
Die stören en nämmlig die ganz Zyt bim Schwätze.

Wottsch au by uns bänggle?
Uff www.vsg-basel.ch erfahrsch meh!





Dr Charles hets gmacht, dir wüsstet was
Mit andere Fraue umegschmuust
Äu sim kleine Brueder macht das Spass
Äu wenn's die Meitli zimmlig gruust
Dr Andrew wär zwar adlig, aber wie «Kunz» und «Hinz»
Dänkt äu er nur mit sim glaine Prinz

Unsre Papi het ganz heftig gschimpft
Mir hänn bim Spiele kei Abstand ka
Mir sinn nit gnese, teschtet und nit gimpft
Drum fluecht är uns so richtig aa
S Mami seit zum Papi: „Due nit so schwierig, Peter
Du behauptsch sälber das sin Anderthalb Meter“

Wenn's kötzelet und miffelet
Wenn's gottsjämmerlig grusig stinkt
Wenn's jähselet und kiffelet
Wenn's di hoorscharf zum Körble bringt
Wenn's seichelet und schisselet, igitt, igitt
Isch e Chromschthlpressoire nümi wit

In Bio hänn mir Käfer ka
Zum Thema und nit in dr Frisur
Dr Borkekäfer luege mir gnauer aa
Do seit unsre Lehrer, mit Proffessur
Dä Käfer sig e Turbo-Bäumlifäller
Stimmt nit: d Esther Käller die isch schnäller



Bi uns chasch ungestroft Gsetz verletze
Unbewilligt demonstriere
Lärme, Spraye, Hüüser bsetze
S Drämmli und dr Bus blockiere
Voll OK isch s Begrabsche vo Polizischte
Aber hesch kei Licht am Trotti chunnsch in d Chischte

Unsre Brueder jä, dä isch verknallt
In e blondi, schlanki, glaini
No wohnt är dihei, wird 18 bald
Doch e Zuekunft hän die beide keini
Är liebt sie nur platonisch, das isch öbbe so
Wie nach Australie z'go und s Racket ipackt loh

Mir mache bi dr Firma BELL gli e Schnupper-Leehr
Schwiinsfiess und Rippli in allne Laage
Schinke und Spägg liebe mir so sehr
Ringelschwänzli und Schwartemaage
Haxe und Buchfett, isch was mir wänn
Sit mir em Papi bim Dusche zuegluegt hänn